

浙江文叢

杭世駿集

〔第四冊〕

浙江出版聯合集團  
浙江古籍出版社

浙江文叢

# 杭世駿集

〔第四冊〕

〔清〕杭世駿 著  
蔡錦芳 唐 宸 點校

浙江出版聯合集團  
浙江古籍出版社

# 道古堂詩集卷九

## 翰苑集三

張庶子鵬翀經進春林淡靄圖敬題六絕句其上蒙恩俯和邀同館徧和余

### 亦繼作

展帙針懸與露垂，奎章璀璨喜申眉。無聲詩博有聲畫，遭際千秋第一時。  
斑管頻抽虎僕毛，聲華三絕玉臺高。太平特進沖融景，肯把燕支注小桃。  
當年一角說孤雲，圖繪流傳寶鑑文。爭似散仙多灑落，春風筆底爲平分。  
賜出陶泓恩敬承，金壺好潑墨三升。玉河莫笑歸鞍緩，袖得璠璣力不勝。  
天葩落紙剎那成，葶甲懷新盡向榮。豈與枚生較遲速，要留佳話在西清。  
不用登牀張洎求，銜來鳳尾自彤樓。琅函夜夜榮光發，知有驪珠在上頭。

陸編修嘉穎兄弟重申卜鄰之好用查浦集中卜鄰西谿韻二首奉簡

樹暗雲深僻似邨，揀無車處放柴門。空庭轉覺蟬嘶靜，比屋交聞雉誦喧。布席但求鄰水竹，營巢豈爲長兒孫？篋中漢史粗成稿，公是公非擬細論。

花漸差肩屋打頭，疏泉支枕類扁舟。兩家隔戶通聲息，一例關門絕應酬。日上墻陰長返照，雨來溝水忽西流。玉堂清福無多子，飽飯黃梁百不憂。

題鄭戶部廷建歸去來辭行看子

之子清妙人，有榮不肯梯。翩然賦歸來，樂事渠可稽。門前沙河水，流過橫塘西。鄰曲六七家，寂歷如山蹊。疏籬榷六枳，黃菊抽新萸。林田足完官，盡以付酒奚。移牀就樹蔭，一飲拚如泥。臥遊羲黃上，懷葛相招攜。

雨

閉門因愛雨，落葉不關秋。淒颼時飄座，蕭疏祇益愁。近思青箬笠，遠憶白蘋洲。幾日城南興，遊踪媿野鷗。

送齊孝廉周南歸天台

石梁雙闕鬱參天，著就三都已十年。難弟笑吟紅藥句，高人獨檢白雲篇。鍵關不接漁陽客，挂席仍浮剡曲船。行看赤城霞起處，風流自署小游仙。

鄭侍讀江足疾乞歸同鄉後進攜酒過餞即席奉呈

先生有道者，淡泊謝榮利。抱經考微言，勤於昌歎嗜。文采及篇章，歌詩特餘技。璧琮璋琥璜，輝輝宗廟器。佐世資碩儒，堂皇允所置。昨朝足疾動，北窻動翹跂。門臨十二街，蕭散若衡泌。曾非下堂愆，頗悟折肱義。上書遽乞休，得遂還山志。問年未耄期，有服製荷芰。由來經術儒，出處繫軒輕。名山究淵微，石渠奏同異。寄跡雖有殊，揚光要無二。他年下六丁，從君發奇祕。

雨後集無畏室酒間讀書有作<sub>(一)</sub>

煙嵐一幅定雲巢，懸向秋堂對枕坳。寂寂張燈高館閉，蕭蕭接響淨蘆交。開鑪預索朋尊續，得句頻搜矮紙鈔。夜色劇愁寒不定，西風應捲幾重茅。

校勘記

〔一〕「讀書」，乾隆五十七年本作「讀畫」，是。

挽潘諭德安禮

貫魚同被寵，獻賦獨凌雲。萬里蠅隨尾，三年雁墮羣。旅魂飄落葉，老淚瀝斜曛。詞客君惟占，應修地下文。

久列中朝望，纔看換紫衫。堅難金石比，善少鬼神監。懸劍悲吳札，趨林哭阮咸。一衾擁涼夢，冷漠稱冰銜。

龍蛇成舊讖，絲竹廢中年。共議奔喪禮，誰分治葬錢？荒幃積塵網，故國望山川。渺矣廣陵散，殘徽不繫絃。

一橐將神載，言歸贛水湄。鶡聲涼月夜，烏影夕陽時。沙竹韋莊宅，江楓宋玉辭。墓門他日過，宿草定餘悲。

題馬吏部志義小像

由來天地本蘧廬，俛仰何因不有餘？  
解識卮言盡駢拇，惠施空負五車書。  
記與藤花有宿緣，清曹勾當過三年。  
玉階一去塵緣隔，乞與天公作散仙。

十月二十二日汪沆翟灝過寓齋小集

沈寥天氣翳銅街，小住俄欣二妙皆。得句超于王子鶴，摘蔬清勝庾郎鮭。奇懷此夕爲君盡，高論不妨與俗乖。欲遣張爲圖主客，却無塵態只青鞵。

寒夜集無畏室共作禪語

言展白氈巾，小憩青豆房。愛此雞羅頂，一室無燠涼。清言匪謂佳，用以發智光。卓彼覺路英，其書亦多方。如春在跗萼，妙蘊不得藏。紛吾持羯磨，義虎力可將。既爲四禪縛，肯戀三宿桑。

吳少司馬應棻招同詞苑諸公集東井書屋時以嶺北集見示

歡場傳喚倒深卮，跋馬冬街到恨遲。作者七人吾亦忝，寒香一榻坐相宜。官因右部論兵偉，詩比東坡過海奇。冰雪崢嶸商歲晚，燒鐙閒話卅年時。

送同年盧豪然令威縣君曾祖名象晉死國難介弟去家不反胡司業襲參

曾爲傳

朔風蕭條轉蓬根，澤腹凍結滹沱渾。我友到官迫程限，臨岐有意停征轅。家門忠孝略數說，語所欲吐聲還吞。荆溪督師殉國義，大節皎若升朝暉。輿尸七旬不得斂，不有介弟誰招魂？同時仲叔執戈出，百口并命吳江濱。先人毀家請紓難，上書自効號於閭。天心有眷鼎遷速，孤意欲與夷齊論。怨家發釁填犴狴，頭可易斷難爲髡。一朝被髮出門去，稚子哭叫窮鄉村。零丁徧寫覓無處，印雪徒見鴻爪痕。有時忽來告葬所，瓦棺聖周非其壙。首陽庶幾可埋骨，欲假尺地皆周原。吁嗟異代有義士，帝紘寬大施春溫。芳華熠燿盛枝葉，垂裕自爾及後昆。我友偏偏守先志，克以仁義爲權樊。一官鞅掌豈得意，要表大烈留乾坤。循良每次儒學傳，孝子亦出忠臣門。明時努力慎官守，畿南雨露容霑恩。藁言樸直少賤繆，至理庸以區昭昏。

布衣詩二首贈鄭山人錫即送其還山陰

大布寬袍古製存，縫來一疋海東藩。持竿不作披裘隱，懷玉何堪被褐論。拂袖固應歸白社，曳裾那肯向朱門？爲言紈袴休相笑，畢竟輸他自在溫。



樵風涇口舊家居，暫駕金臺轂舛車。青紫四時輕仕宦，聲華三絕擅詩書。椶輶筇杖行相稱，老帶莊襟樂有餘。此去莫言長息隱，聖朝物色在樵漁。

### 題翟灝庚申詩卷

巨壑縱餘猶掉尾，大波迴處更生瀾。自從玉局翁仙化，如此驚才更見難。  
朔風攪雪夜蕭條，大卷編年燼自挑。歎息後來誰獨步，言超故自阿龍超。  
卷裏喜無偷鶴句，牀頭猶見捉刀蹤。一端莫遣邯鄲笑，作奏先宜去葛龔。時爲余代酬應之作，故末章及之。

### 上元公讌二首

香醅如雪發春缸，皓月玲瓏透八窗。照壁低人駢瘦影，窺簷老樹立空腔。官貧未惜錢三百，筆軟能添字幾雙。勝典得寬宵柝禁，夜深猶話玉蟲缸。  
初旬休暇脫朝衫，春事徐聽說大凡。瑤鳳已先三日集，燭龍齊向六街銜。合尊肯使良宵負，入座都將俗禮芟。高興倘能留不盡，落鐙重達鯉魚函。

### 送同年陳主事鐔之官遼海

一時羣彥盡登仙，獨爾清才出守邊。隻影蒼茫天地闊，敝裘蕉萃雪霜綿。蛾眉月落忽千

里，雁足書來動隔年。紫塞莫教迴首望，春風不到玉關前。

空囊不肯破天慳，此段真教去住艱。望遠類如星宿海，澆愁疑有沃焦山。途窮莫怨微官累，程迫方知白日閒。猶有舊時薇省客，瓜期屈指海西還。時同年柴嶼青爲郎中。

關河滿目意蕭寥，謹護邊儲答聖朝。拙宦不知爲客樂，貧交翻惜去鄉遙。漫天宿莽餘疲馬，絕徼寒雲見暮鷗。多少畫工圖出塞，一腔孤緒未容描。

佳时才過試鐙風，爲遣離憂酒一中。用傳棄繻真細事，短衣匹馬奮單雄。但言小別須千日，若問同僚只數公。此夕與君難判袂，一憑詩句話深衷。

### 次崇明許邑宰惟枚栽花四首

門第清華邁列卿，雷封聊試小經營。召棠郇黍人爭誦，莫認河陽花繞城。  
彷彿蓬壺落掌中，層層樓閣暈青紅。擬從龍戶乘槎到，引去唯愁擘岸風。  
栗留聲裏曉班春，如畫郊垆人望新。白髮老農扶杖語，太平人勝武陵人。  
不妨載酒作遨頭，治行喧傳第一流。試問漢廷諸茂宰，栽花海上可能不？

### 送陳舍人兆崙之武昌

惜別慚無酒膽麤，衆咻真作楚遊呼。君行始此不爲遠，吾道自今恆歎孤。好景定煩柔翰

寫，輕帆況有玉人俱。江行輪與圍棋處，清簟疏簾稱雅娛。

### 雨中用柳州苦竹橋韻簡吳秀才可馴

縱縱白雨點，漠漠青瑤林。蕭瑟無凡響，寂寞有苦心。端居絕妄營，興到時一吟。洄池潛輕篠，高柯斷來禽。歡然契古賢，命酒疏堂陰。

### 吳上舍城見過次其題壁韻

人境辛勤小有廬，藥欄花徑愛夷與。屏山數朶雨餘出，齋樹兩株風後疏。文字欲參齊物論，形骸都在絕交書。清時到處供行樂，齒冷靈均賦卜居。

### 次前韻寄故園兄弟

松里先人有敝廬，問渠何事不歸與。心如熱火頻頻滅，髮比秋條漸漸疏。人世生涯唯習嬾，在官罪過祇鈔書。鴻妻一向能甘隱，紙閣蘆簾就爾居。

### 送廖昊前令徐溝

明府之官去，青袍草色迷。關長蓮岳近，天人井陘低。別館彈琴靜，孤城擊柝齊。遙聞漢

循吏，桑柘綠陰翳。

送大廷尉汪先生予告還休寧三首

方瞳紺髮侍彤廷，耿耿東方見歲星。後輩六卿扶玉杖，先生四紀領槐廳。趨朝小斂調羹手，退食還鈔相鶴經。早向門牆長立雪，巋然魯殿奉儀型。

溫綸初下許懸車，身退功成次第書。吳越羅材收竹箭，江淮奏績志河渠。灘厓滕閣懸金槩，水部蘭臺噪玉除。盡識于公門必大，翻從祖道戀華裾。

老臣戀闕抱丹心，其奈霜華已滿簪。一代荀陳歸大匠，兩邦吳楚紀儒林。朱砂湯好攜壺坐，白嶽峰深倚杖吟。笑對少時親種樹，蒼髯黛色鬱千尋。

翟灝遺龍井新茶

渴吻年時逐日新，一封感寄雨前春。擎來解說槍旗好，辛苦筠筐細摘人。活水雲羅濾更清，森森香味出寒鐙。閒窻似向家山坐，聽徹松濤竹雨聲。

周憲阻雨書堂留飲<sub>(二)</sub>

高閣留賓破寂寥，張鐙且復坐中宵。已看墨汁金壺瀉，難得明珠碧瓦跳。千里鄉思憑濁

酒，一天清響共疏寮。玉山雅集煩公等，隔日應須走馬邀。

校勘記

〔一〕乾隆五十七年本此詩置於卷九《爲王孝廉任湖題錢觀察元昌畫藤花》詩後。

### 起林上人過飯書堂

澄觀翫三餘，幽居衆美萃。上人遠相過，即事儷清思。未妨無着心，畧寓文字戲。器鉢非凡聲，蔬筍絕常嗜。天風激靈籟，妙語得回施。諸餘諒難空，教外亦禪寄。何時策青林，同宿烟際寺。

### 門人孫吉士拱極邀諸同年載酒見過

勝地宜幽賞，華筵久寂寥。愛君能載酒，歌嘯永今朝。韓筆方原道，雄文善解嘲。但令高會數，何惜馬蹄遙？

### 王孝廉任湖下榻小園有詩次韻

百里江流繞越城，挈舟相訪昔塗更。藜羹芋飯家山夢，菰葉蘆梢水國情。異地不曾拋席帽，荒齋難得共鐙檠。歲寒與子期松竹，一笑新成日下盟。

客裏孤懷百不任，一天雲日互晴陰。巢如驚鶻時還徙，人比秋蟲只愛吟。拚醉借杯澆塊壘，貪涼移榻就幽森。請看矍鑠餘狂態，彩筆重題漢上襟。

隨身不用錦囊奚，矮閣團焦類蟄棲。馬上烟嵐屏上句，愁邊渲染醉邊題。色融嵩少三花樹，聲帶黔南百丈谿。賸欲與君窮野望，美懷多在夕陽西。

十笏幽齋爲爾營，茶烟長繞鬢絲生。論文不用追朱穆，漫刺何妨學禰衡。桑下定增三宿戀，蘭亭舊有百年情。身如野鶴秋逾健，游戲俄看徧玉京。

撲棗

堂背無雜花，劣有兩樹棗。一枝亞簷低，一枝出牆矯。風來時動搖，絕勝叢竹掃。結實定幾擔，飽受日色杲。貧家無餘糧，惟此以爲寶。垂涎走饑童，失喜賺聾媪。纂纂青紅兼，墮地每橫草。長恐霜威侵，或被風拉槁。幽詩紀八月，長竿撲宜早。預宜扱衣衽，旋見溢栲栳。喜無桃蟲啄，幸免蓼蟲齧。赤心古所嘉，甘味世不少。愛茲家園植，堆案愜幽討。轉愁空枝鳴，不得壓清曉。

題金暑野亭玩月圖四首

鏡湖巖壑野亭春，況復盤盤瀉爛銀。我妒姮娥少公道，不應偏照苦吟人。

玩月由來見古情，苦無胸次寫空明。羨君真到蟾蜍窟，敲着玻璃便有聲。  
才上層霄萬象融，能來難得晚烟空。只須倚樹團圞望，名字居然在月中。  
碧天真個淨纖埃，放眼空亭亦快哉。一派清光描不得，無人解識謝莊才。

飲梁通守鴻寓用歐公聖俞會飲韻呈趙鴻臚之垣李愔包祚永楊朝鼎三侍御

天晴酒伴相牽拂，翩然出飲馳彫談。哨壺枉矢樂賓具，固辭與請紛皆三。八尺鐙檠不嫌短，光閃瑤席無洪纖。雄辭騰蹕破詰窘，窄量宛轉開機緘。簾端香氣時掩冉，檻外秋色尤紅酣。鄒平食憲次第列，熊魚嗜好能相兼。珍珠槽醉琥珀滴，甕口不用紅泥鈐。百觚騰處玉鱗動，一切苛令皆除芟。嗟余亦與捉臥甕，三吃三啐徒貽慚。劍鐔青熒照短髮，花蘂瑣碎飄輕衫。諸公乘興索微咏，包括雅意何能咸？歸途緩轡指河漢，鐙火不隔斜街南。

飲歸再用前韻呈王孝廉

城西罷飲意不厭，擬歸卜夜仍深談。借車載我喜兼兩，無月照影焉成三？移鐙過林光暎暘，折枝壓棧紅尖纖。意行絕類磨蟻旋，開口肯效金人緘。攤衾促坐不寂莫，飛觥餘興猶沈酣。夔虵憐愛理難譬，熊蛙肥瘦勢詎兼。更殘數數換白蠟，吻渴急急開紅鈐。銑谿澁體恐難學，金筴綺語應從芟。經營丘壑惟子擅，墨守章句良余慙。時清幸得側烏帽，官冷且免拖朝

衫。新篇脫手美無度，至論砭俗專而咸。幾時說詩圖主客，子爲張北吾周南。

三用前韻說餅

林昏雨黑客打戶，岸然高睨而大談。問以晚食百不要，寒具劣可進二三。雲確屑粉膩復黏，重羅濾麵白且纖。霜熬徐飛海水沫，蔗漿乍解閩山緘。川椒蜀薑百末和去，活火炙釜力厚酣。花瓷盛爾軟美恰，頭綱配爾甘脆兼。吾雖牙齒老未缺，畢生不見紅綾鈐。趙岐吳均兩寂寞，公羊經義誰能芟？并刀快截差不惡，虛堂細嚼夫何慙。搓酥轉恐澆名畫，浣手起著古樣衫。上九肥遯無不利，筮者布卦將爲咸<sup>〔一〕</sup>。明當期子賣餅肆，千人石畔吳山南。

校勘記

〔一〕「布卦」，乾隆五十七年本作「拈卦」。

夏編修庭芝見遺絨巾輒效宮體奉簡

客從罷洗湯泉後，買得絨巾別贈人。白氎麤疏難並美，金梭想象迴含辛。頻攜襟袖香仍越，略與挾抄色更新。若是彈棊容妙拂，當場恐惹玉奴嗔。



金文淳表曰：修袁枚三吉士招同戴上舍，廷熿小園看菊，以濠梁同見招爲韻分。

### 賦予得招字

籬下叢菊花，有白無枯焦。其一尤秀出，矯立矜風標。際此晴日美，爽氣凝修條。延賞得短句，較勝獨酌謠。騷人例愛飲，一一踐夙招。其人如菊澹，兀傲不可調。其詩如酒醞，但見格律超。園丁頗好事，汲井滋靈苗。矧以詩吻渴，可少芳醞澆。醉便折花嗅，瘦影吹蕭蕭。

### 張員外嗣衍見餉佳菊數本用前韻奉謝

燕土惟黑墳，兆坼如龜焦。瓦盎種野菊，惜少佳名標。張侯餉數本，濯濯無枯條。微吟動高興，獨酌成康謠。愛之詎能狎，呼之不須招。月來逾澹蕩，風起徐刁調。多傲少俗媚，此格天然超。亭岩竹窗裏，昔昔抽新苗。日以露華洗，兼用清泉澆。持螯恐難繼，亟緯風中蕭。

### 金吉士重過書堂有詩見投次韻奉答

爲有田家濁酒盆，不教秋色臥籬根。霜螯露韭清難飽，凍蜨癡蜂咽不喧。吸井有香泉繞戶，枕屏如畫月侵門。巖居便是延齡術，合向山靈酌一尊。